

HITZ BITAN

EUSKALTZAINDIA. Bilbon euskara indartuko dute

Bilboko Udalak eta Euskaltzaindiak euskararen aldeko hitzarmena sinatu dute

A. Güemes | BILBO

Iñaki Azkuna Bilboko alkateak eta Jean G. Haritzelhar euskaltzainburuak Udala eta Euskaltzaindiaren arteko lehendabiziko lankidetz hitzarmena sinatu zuten atzo goizean Bilboko udaletxean. Xede horri begira, Bilboko Udalak 2002ko aurrekontutik 18.030 euro ordainduko dizkio Akademiari. Azkunaren ustez, euskararen aurrean jarra bi daude: «Lagundu edo kalte egin ahal diogu, eta guk zaintzea erabaki dugu», azpimarratu zuen. Bestalde, euskaltzainburuak «eskerrik bizienak» eman zituen. Aldi berean, Euskaltzaindia 1976tik osoki eza gututako erakunde bat dela go-

gorarazi zuen, Espainiako Gobernuko Errege Dekretua zabaldu zenetik, hain zuzen ere, eta guztiz onartua dela bai Estatutuan, bai Eusko Jaurlaritzan, baita foru aldundietan ere. Jean Haritzelharrek Bizkaiko, Arabako, Gipuzkoako eta Nafarroako aldundien laguntza goratu zuen bereziki; «ez dugu inoiz ahaztuko Euskaltzaindia diputazioei esker jaio zela», esan zuen.

Hitzarmen horren bitartez, Autonomia Estatutuak Euskaltzaindiari aitortzen dion erakunde aholku emaile izaera aintzat hartzeaz gain, euskararen sustapena eta garapena bultzatu nahi dira, euskal herritarren hizkuntza eskubideak bermat-



Iñaki Azkuna eta Jean Haritzelhar, atzo, lankidetz hitzarmena sinatzen.

tzeko asmoz. Hala, Euskaltzaindiak, Bilboko Plaza Berriko bere egoitza nagusian eskaintzen dituen ohiko zerbitzuez gain, bestelako kultur ekintza eta ekitaldiak sustatuko ditu Bilbon.

Urtean behin, halaber, Euskaltzaindiak lankidetz hitzarmenaren garapenari buruzko jarduera plangintza eta oroitidazkia igorri beharko dizkio Udalari.

Euskaltzainburuaren arabera, hirietan euskararen garapena diruz indartzea beharrezkoa izateaz gain, «oso pozgarria da euskaldun guzientzat, herri zein hirikoak izan».



MONIKA DEL VALLE / ARGAZKI PRESS

EURITEAK

Bizkaiko 18 udalerrik diru laguntzak jasoko dituzte, euriteen ondorioz izandako kalteei aurre egiteko

Euriteek eragindako kalteak konpontzeko, Bizkaiko 18 udalerrik jasoko dute diru laguntza, Bizkaiko diputatu nagusi Josu Bergarak atzo adierazi zuenez. Foru Dekretu bidez zehaztu dira diru laguntza jasoko duten udalerriak. Bertan zehazten denez, 30 milioi euro azpiegitura publikoak berritzeko bideratuko dira. Horietatik 14,5 milioi errepedeak konpontzeko erabiliko dira, eta 9,7 milioi udaletxeetako kalteak berritzeko.

ISTRIPUAK

Kamioi batek su hartu zuen atzo A-15 errepedean

Pneumatikoz kargatutako kamioi batek su hartu zuen atzo A-15 autobidean, Latasa Urritza irteeratik gertu. Gidaria, ordea, ez zen zauritu. Sutea eragin zuten arrazoiak ezezagunak dira oraindik. Errepidea lau orduz itxi behar izan zuen Foruzaingoak.

ATXILOKETAK

Guardia Zibilak bi lagun atxilotu ditu Erriberriko jaietan 2.700 disko piratekin

Bi lagun atxilotu zituen hilaren 14an Guardia Zibilak Erriberriko jaietan, haien furgonetan 2.700 CD pirata atzeman ondoren. J.M.L.M eta L.H.T.F goizaldeko ordu biak aldera atxilotu zituzten Poliziak jarritako kontrol batean. Atxiloketaren unean, dokumenturik gabe zeuden biak. Tafallara eramane, eta epailearen esku geratu dira.

BAZTERKETA

Ijitoen aldeko lankidetz mahaia abiatuko du gaur Iruñeko Udalak

Iruñeko Udalak ijitoentzako lankidetz mahaia jarriko du martxan gaur, horien bizitza kalitatearen alde lan egiten duten politika instituzionalak eta programak errentagarri bihurtzeko asmoz. Iruñean 2.500 ijito inguru bizi dira, eta asko egoera kaskarretan.

AZPIEGITURAK

Europako Batzordeak ikertu egingo ditu Hondarribiko aireportua handitzeko «ustezko irregulartasunak»

Europako Batzordeak ikerketa irekiko du Espainiako Gobernuak Hondarribiko aireportua handitzeko egindako plangintzan egon daitezkeen «irregulartasunak» aztertzeko. Yolanda de Pablo Irungo Ingurumen zinegotziak adierazi zuenez, «badirudi nahikoa urratzen duela Europako araudia».



JAVIER CEBOLLADO / EFE

DROGAK

Nafarroako bi gazte atxilotu dituzte Zaragozan, estasi pilulak atzeman ondoren

Zaragozan egindako polizia operazio batean 10.000 estasi pilula atzeman eta lau lagun atxilotu dituzte. Horietako bi Nafarroako Cortes herriko 20 eta 21 urteko gazteak dira. Zaragozako Polizia Judizialeko komisariburu Pedro Garijok adierazi zuenez, «lehen aldiz atxilotu dituzte gazte horiek halako ekintza bategatik»; hori dela eta, haren iritziz, polizia operazioa zaila izan da. Haien etxebizitzan, besteren artean, 34.790 euro eta hainbat droga aurkitu zuten poliziek igandean. Atxilotzeko unean ere droga gainean zeramaten gazteak.

INGURUMENA

Hiru enpresari eta Hernaniko bizilagun bati isunak jarri dizkie Nafarroako Ingurumen Sailak

Nafarroako Ingurumen Sailak hiru enpresa eta pertsona bat zigortuko ditu, Ingurumeneko Foru Legea ez betetzeagatik. Vianako Logisiete enpresari 3.000 euroko isuna jarri dio, baimenik gabe harri lubeta bat eraikitzeagatik. Bestalde, hondakinak segurtasunez ez mantentzeagatik, 1.803 euro ordaindu beharko ditu Talleres Elorz enpresak. Azkenik, baimenik gabe eta errepedetik kanpo auto lasterketa antolatzeagatik, isuna jaso du GPS Rutas Aventuras Madrilgo enpresak. Halaber, Hernaniko bizilagun bati ere isuna jarri diote, hiru oilagor harrapatzeagatik.

IRAGARKIA

2002ko irailaren 13ko 173. Gipuzkoako Aldizkari Ofizialean argitaratutako iragarkian adierazitakoaren arabera, eta udaletxe atzekalde eta Ellosegi 11 zbk.tik 13 zbk.ra bitarteko guneko obra arruntren proiektua burutu ahal izateko beharrezko diren ondasun eta eskubideak formalki okupatzeko, titularrei dei egiten zaie iragarkian adierazitako egunean eta orduan Udaletxera etor daitezen, afektatutako ondasun eta eskubideak okupatu aurreko aktak egitea.

Lazkao, 2002ko irailaren 16a. ALKATEA. Izp.: Felix Urkola Iriarte.

Lazkaoko Udalak